

**ՀԻՈՄԻ ՔԱՂԱՔԱԿԱՆՈՒԹՅՈՒՆԸ ՀԱՅԱՍՏԱՆՈՒՄ ՊՐԻՆՑԻՊԱՏԻ
ԿԱԶՄԱՎՈՐՄԱՆ ՇՐՋԱՆՈՒՄ
(պարբերացման փուլ)**

Ա. Է. ԽԱԶԻԿՅԱՆ

Պրինցիպատի կազմավորման շրջանում Հռոմի արևելյան քաղաքականության ուսումնասիրությունը, այդ քաղաքականության ստրատեգիական նպատակների իմաստավորումը, իրականացման տակտիկական ձևերի ու մեթոդների բացահայտումը և զարգացման փուլերի որոշումը կարևոր նշանակություն ունեն Հայաստանի մ. թ. ա. I դ. վերջի—մ. թ. I դ. առաջին կեսի պատմության ուսումնասիրության համար:

Հռոմի արևելյան քաղաքականության ուսումնասիրությանը և դրա պարբերացմանն իրենց աշխատություններում անդրադարձել են Թ. Մոմզենը, Ն. Դեբեվոլսե, Դ. Մեյջին, Կ. Յիգելը, Ա. Գարազաշյանը, Հ. Աստուրյանը, Հ. Մանանդյանը¹ և ուրիշներ: Նշված աշխատությունների ընդհանուր թերությունը պետք է համարել վառ արտահայտված ռոմանոցենտրիզմը, երբ անտեսվում է Հռոմի արևելյան քաղաքականության ագրեսիվությունը և Հռոմի հետ առնչվող մյուս բոլոր պետությունները դիտվում են քաղաքական ակտիվությունից զուրկ և նեղկայացվում լոկ որպես հռոմեական քաղաքականության օբյեկտներ: Նման մոտեցման դեպքում, բնականաբար, Հռոմի արևելյան քաղաքականության պարբերացման հիմքում գրվում են միայն հռոմեական պատմության արմատական իրադարձությունները, իսկ ավելի հաճախ՝ լոկ սուբյեկտիվ գործոնները, օրինակ՝ կայսրերի և նրանց շրջապատի փոփոխությունները: Այս իսկ պատճառով հռոմեական կայսրերի կառավարման տարիները գիտվում էին որպես Հռոմի արևելյան քաղաքականության փուլեր:

Մեր կարծիքով պրինցիպատի կազմավորման շրջանում Հռոմի արևելյան քաղաքականության մեջ տեղի ունեցող նշանակալից փոփոխությունները պայմանավորված էին հիմնականում օբյեկտիվ պատճառներով, մասնավորապես Պարթևստանի հետ շղաղարող մրցապայքարով: Ընդ որում, Հռոմի արևելյան քաղաքականությունը պայմանավորող առավել կարևոր գործոններից էր հայ ժողովրդի (և Առաջավոր Ասիայի մյուս ժողովուրդների) պայքարը անկախության համար:

Ուսումնասիրվող հարցին վերաբերող աղբյուրները սակավաթիվ են: Դեպքերի կապակցված շարադրանքը տալիս են հիմնականում Տակիտոսը և Դիոն Կասիոսը: Նրանց հաղորդումները զգալիորեն լրացնում են Սվետոնիոսը, Վելլեսը Պատերկուսը, Յիցերոնը, Հովսեփոս Փլավիոսը, Ստրաբոնը և Մովսես Խորենացին:

Հռոմեական տերության արևելյան քաղաքականությունն Առաջավոր Ասիա նրա ներթափանցման սկզբից իսկ բնորոշվում է ռազմադիվանագիտական ակտիվ գործունեությամբ՝ ուղղված այդ շրջատարածքում իր անբաժան տիրապետության հաստատմանը, տնտեսապես զարգացած և ստրատեգիապես

¹ Հ. Աստուրյան, Քաղաքական վերաբերություններ ընդմեջ Հայաստանի և Հռոմի մայ, Վենետիկ, 1912, Ա. Գարազաշյան, Քննական պատմություն Հայոց, Բ մաս, Թիֆլիս, 1895, Հ. Մանանդյան, Երկեր, հ. 8, Երևան, 1977, Т. Моммзен, История Рима, т. V. М., 1937; N. Debevoise. A political history of Parthia, Chicago, 1934; D. Magie. Roman rule in Asia Minor, Princeton, 1950; K. Ziegler, Die Beziehungen zwischen Rom und dem Partherreich, Wiesbaden, 1964.

կարևոր տարածքների աստիճանական բռնազավթման միջոցով: Առաջավոր Ասիայի պետությունների ու ժողովուրդներից ուղիղ տված տեղական և ուժեղ դիմադրությունը Հռոմին հարկադրեց նվաճված տարածքների պաշտպանությունը կազմակերպել սահմանապահ կախյալ պետությունների միջոցով, որոնք հայտարարվում էին «*amici populi romani*»^{*} «բարեկամ» դեր կատարելով Հռոմի և նրա հակառակորդների միջև: Հռոմի տիրույթներն Արևելքում, այսպիսով, տարաբաժանվում են ռուդոկի (անմիջական) տիրույթների և քաղաքականապես վերահսկվող (կախյալ) տարածքների: Արևելքում հռոմեական սահմանների ընդլայնման դժվարությունն ու տեղականությունը այս երևույթը վերածեցին համակարգի, որը խորապես արմատավորվեց Հռոմի արևելյան քաղաքականության մեջ:

«*Amicus populi romani*» քաղաքական բանաձևը հռոմեացիների համար միանշանակ չէր: Կախված հանգամանքներից, կոնկրետ քաղաքական խրաչրությունից և ուժերի փրական հարաբերակցությունից, այն կարող էր նշանակել. ա) Հռոմեական շահերի աշակից և պաշտպան, ինչպես նաև ընդհանուր թշնամու դեմ պայքարում Հռոմի օգնությունն ու հովանավորությունը վայելող դաշնակից, բ) Կախյալ թագավորություն կամ տարածք, որում Հռոմն ուժեղ տնտեսական դիրքեր էր ձեռք բերում, ստեղծում սոցիալական հենարան և ժամանակի ընթացքում կլանում երկիրը քաղաքականապես՝ վերածելով պրովինցիայի:

«*Amicus populi romani*» հասկացության այս երկիմաստության շրջանակներում էլ հենց որոշվում էր Հռոմի իրական վերաբերմունքն իր «դաշնակիցներին» նկատմամբ՝ ամեն մի կոնկրետ դեպքում: Իր ազդեցիվ քաղաքականության մեջ բախվելով որևէ խոշոր տերության, Հռոմը «բարեկամական» հարաբերություններ էր հաստատում նրան դիմակայող փոքր պետությունների հետ, ամեն կերպ վերջիններիս օժանդակելով և ուժեղացնելով, նկատի ունենալով նրանց օգնությունն առաջիկա ընդհարումներում: Պատերազմում հաղթելով իր գլխավոր հակառակորդին, Հռոմը չէր փորձում անմիջապես զավթել նրա տարածքը, զգուշանալով ժողովրդական զանգվածային ելույթներից, այլ մասնատում և թուլացնում էր պարտվածին, նրա կորուստների հաշվին պարզեցնելով իր «դաշնակիցներին»: Հետագայում, երբ գլխավոր հակառակորդը Հռոմի նմանօրինակ խարդավանքների հետևանքով թուլանում և այլևս ռազմական վտանգ չէր ներկայացնում, այն հռչակվում էր Հռոմի նոր «դաշնակից և բարեկամ» ստանձնելով «բարեկամ» դեր՝ հերթական հակառակորդների հետ Հռոմի մղելիք պայքարում: Միաժամանակ, վերանում էր նախկին «դաշնակից» օժանդակելու անհրաժեշտությունը, և վերջինս իրավահավասար կողմից վերածվում էր կախյալ պետության: Այդ ժամանակից Հռոմը սկսում էր նման պետությունում ուժեղացնել իր տնտեսական դիրքերը, վերջինիս քաղաքականապես թուլացնել, խառնվել նրա ներքին գործերին, գահից զրկել իրեն ոչ ձեռնտու կառավարողներին, թագավոր հռչակելով իր դրածոներին: Սովորաբար, որոշ ժամանակից հետո, երկիրը վերջնականապես «հաստեղծանում» էր՝ Հռոմեական տերությանը որպես պրովինցիա միացվելու համար:

Քանի որ ժամանակագրական առումով առաջին վիճակը սովորաբար նախօրոքում էր երկրորդին, ապա պետք է կարծել, որ «*amicus populi romani*» ձևակերպումն անցնում էր իմաստավորման երկու աստիճան. 1-ին աստիճան՝ իրավահավասար կամ համարյա իրավահավասար «դաշնակից», 2-րդ աստիճան՝ կախյալ կամ կիսակախյալ «դաշնակից»:

Գործելով «*divide et impera*» («Բաժանիր, որ տիրես») սկզբունքի համաձայն, Հռոմը, բարեկամական հարաբերություններ հաստատելով Պարթևստանի հետ, Լուկուլլոսի և Պոմպեոսի արշավանքների շնորհիվ իր վերահսկողությունը հաստատեց Հայաստանի նկատմամբ: Ըստ մ. թ. ա. 66 թ.

^{*} Հռոմեական ժողովրդի բարեկամ:

կնքված հայ-հոռմեական պայմանագրի, Հայաստանը վերածվեց Հոռմի համարյա իրավահավասար «դաշնակցի»՝ պահպանելով իր ներքին ինքնուրույնությունը և գիտված ուժերը, լոկ իր արտաքին քաղաքականությունը ենթարկելով Հոռմի շահերին²:

Արևելքում Պոմպեոսի հաստատած քաղաքական համակարգում Հայաստանին առանձնահատուկ դեր էր հատկացվում: Շարունակելով մնալ Պարթևստանից հետո արևելքում հզորությամբ երկրորդ պետությունը, այն պետք է զսպեր դեպի արևմուտք ձգվող՝ հոռմեական տիրույթները, Պարթևստանի հնարավոր ոտնձգությունը:

Սկսած այս ժամանակից և մինչև Օգոստոսի իշխանության հաստատումը, Հայաստանը ժամանակավորապես դադարեց Արևելքում հոռմեական ազդեցության ուղղակի օբյեկտը լինելուց: Նման օբյեկտ նշված ժամանակաշրջանում հանդիսանում էր Պարթևական տերությունը: Դա օբյեկտիվորեն բխում էր հանրապետության վերջին տասնամյակներում Հոռմի արևելյան քաղաքականության զարգացման ազդեցիկ ընթացքից: Քանի դեռ Հոռմը չէր կլանել Կապադովկիայի, Պոնտոսի, Գալաթիայի, Կոմագենեի և Կիլիկիայի կախյալ թագավորությունները, իսկ Պարթևական տերությունը չէր հարկադրվել դառնալ Հոռմի «դաշնակից և բարեկամ», չէր կարող փոխվել և Հայաստանի կարգավիճակը:

Հոռմի արևելյան քաղաքականության հաջորդ խնդիրն էր իր գերիշխանությունը ենթարկել Պարթևստանի, ինչը հնարավորություն էր տալ ժամանակի ընթացքում կլանել և Հայաստանը: Հենց այս էր Կրասոսի և Անտոնինոսի պարթևական արշավանքների նպատակներից մեկը, որոնք, սակայն, ցանկալի արդյունք չտվեցին: Պարթևստանը, Հայաստանի հետ դաշնակցած, պաշտպանեց իր անկախությունը, դրանով ուժեղ հարված հասցնելով հոռմեական առաջխաղացման արևելքում: Ենթադրվում էր Պարթևստանի հետ դաշինքի, Հայաստանի Արտաշես II-ի կառավարման շրջանում վերականգնեց իր անկախությունը:

Հոռմեական տերությունում ներքաղաքական պայքարի ավարտը և Օկտավիանոս-Օգոստոսի պրինցիպալի հաստատումն արմատապես փոխեցին Հոռմի արևելյան քաղաքականության նպատակները: Թե՛ հասարակական և թե՛ անձնական շահերից ելնելով, Օգոստոսը հրաժարվեց Արևելքը նվաճելու գաղափարից, հիմնական ուղադրությունը նվիրելով իր իշխանության ամրապնդման և դրա իրավական ձևակերպման գործին, պետության և նրա սահմանների ամրապնդմանը:

Ըստ Գ. Կնաբեի, «նոր ընդարձակ նվաճումներից հրաժարվելու քաղաքականությունը պայմանավորված էր օբյեկտիվորեն. նորանոր ստրուկների ու հարստությունների զավթումը դադարել էր հոռմեական էկոնոմիկայի զարգացման պայմանը լինելուց, կայսրությունը հասել էր առավելագույն չափերին և նրա հետագա ընդարձակումը կարող էր արդեն անհամատեղելի դառնալ միասնական կենտրոնից ղեկավարման սկզբունքի հետ, նվաճումների աճը ենթադրում էր բանակի ուժեղացում և աճ, ինչին կայսրությունը կարող էր և չգիտեմալ թե՛ տնտեսապես, թե՛ քաղաքականապես. հոռմեական և արտահոռմեական աշխարհների միջև հաստատվել էր ուժերի այն հավասարակշռությունը, որը խախտելն աննպատակահարմար էր և, ինչպես ցույց տվեց Տրայանոսի պարթևական արշավանքը, ծայրաստիճան վտանգավոր»:

Պրինցիպալի պաշտոնական կարգախոսներ հռչակվեցին խաղաղությունը, ազատությունը, բարօրությունը: Սա նշանակում էր նոր կայսերական քաղաքականության անցում, սակայն բոլորովին էլ չէր նշանակում հրաժարում ակտիվ արտաքին քաղաքականությունից. հրաժարվելով Հայաստանը և

² Ռ. Լ. Մանասկյան, Տիգրան Մեծ, Երևան, 1937, էջ 214—216:

³ История древнего мира (Под ред. И. М. Дьяконова, В. Д. Неронова, И. С. Свенцицкой), кн. 3, М., 1982, с. 83.

Պարթևստանը նվաճելու, Առաջավոր Ասիայի իր տիրույթների անվտանգությունն ապահովելու հարցում Հռոմը շեշտը դրեց գիվանդատության վրա:

Պրինցիպատի քաղաքական համակարգի հաստատմանը հաջորդած առաջին երկու տասնամյակները բարեհաջող էին Հռոմի արևելյան քաղաքականության համար: Օգտագործելով Պարթևստանում Հրահատ IV-ի և Տրդատ II-ի միջև ընթացող ներքաղաքական պայքարը, Հռոմը պատերազմ սկսելու սպառնալիքով ռազմացույց անցկացրեց սահմանի վրա և դրանով Պարթևստանին հարկադրեց վերադարձնել Կրասոսի և Անտոնինոսի լեգեոններից գրավված հռոմեական դրոշներն ու ռազմագերիներին⁴: Մ. թ. ա. 20 թ. Հռոմի և Պարթևստանի միջև կնքվեց պայմանագիր⁵ և հաստատվեց տեական խաղաղություն: Պայմանագրի կնքումով Հռոմը լեգոնացրեց պարթևական վտանգը, սակայն Արևելքում հռոմեական քաղաքականության լիակատար հաջողությունը համար անհրաժեշտ էր նաև Հռոմի անհաշտ հակառակորդ և անկախ տիրակալ Արտաշես II-ի փոխարեն Հայաստանի գահին դրածո հաստատել, դրանով Հայաստանը դարձնել կախյալ թագավորություն, այն ներթափանցելով Հռոմի ազդեցության ոլորտը:

Թեև աղբյուրներում ուղղակի հիշատակություններ չկան այն մասին, որ հռոմա-պարթևական պայմանագիրը վերաբերում էր նաև Հայաստանին, անկասկած է, որ այն ներառել է նաև այս հարցը: Պետք է կարծել, որ Պարթևստանը, տեղի տալով Հռոմի ճնշմանը և նրա հետ կնքելով պայմանագիր, պարտավորվել էր նաև ռազմական օգնություն ցույց չտալ Հայաստանին՝ նրա գահակալության հարցում Հռոմի միջամտության դեպքում: Իրադարձությունների հետագա ընթացքը հաստատում է մեր այս ենթադրության ճշմարտացիությունը:

Հռոմի ռազմագիվանագիտական ճնշման ներքո Արտաշես II-ը զոհունաց դավադրության և հռոմեական լեգեոններով երկիր ներխուժած Տիրիդատի հերոսը հալոց արքա թագադրեց սպանվածի եղբորը՝ Տիգրան III-ին⁶: Արևելքում դիվանագիտական այս հաջողություններից հետո Օգոստոսը սենատին հայտնեց իր կարծիքը՝ հռոմեական տիրության սահմանների հետագա ընդարձակման աննպատակահարմարության մասին⁷: Պարթևական և հայկական հարցերի բարեհաջող լուծումը Օգոստոսին հնարավորություն տվեց հռոմեական պրովինցիաների վերածել Գալաթիայի, Պիսիդիայի, Խսավրիայի և Արևմտյան Լիկաոնիայի կախյալ թագավորություններին⁸:

Այսպիսով, արդեն Օգոստոսի կառավարման առաջին տարիներին ուրվագծվեցին Հռոմի արևելյան քաղաքականության հիմնական ստրատեգիական նպատակները. 1. արդեն նվաճված կամ էլ իր գերիշխանության տակ ընկած Փոքր Ասիայի և այլ ժողովուրդների վրա հռոմեական տիրապետության ամրապնդումը և պաշտպանությունը: 2. Հռոմի արևելյան տիրույթների նկատմամբ Պարթևստանի հնարավոր ոտնձգության վտանգի կանխարգելում՝ վերջինիս քաղաքականապես թուլացնելու միջոցով: 3. Հայաստանի վրա հռոմեական գերիշխանության հաստատում, թույլ չտալու նրա դաշինքը Պարթևստանի հետ. Հայաստանի վերածումը հյուսիսից և արևելքից հռոմեական տիրույթները պաշտպանող վահանի, դրանով իսկ Պարթևստանի համար մըշտական սպառնալիք ստեղծելով:

Վերջին խնդիրը Հռոմի համար առաջնահերթ նշանակություն ունեցողի դրա լուծումից էր ամբողջապես կախված մյուս երկու խնդիրների իրականացման հնարավորությունը: Հայաստանը, այսպիսով, իր կարևոր ստրա-

⁴ Cassius Dio, *Historiae Romanae*, I, V, 9 4—5 Velleius Paterculus, *Historiae Romanae*, II, 64.

⁵ P. Orosius, *Historiae Adversum Pagaros*, VI, 21, 29.

⁶ Cassius Dio, LIV, 9, 3—4.

⁷ Cambridge Ancient History (CAH), Cambridge—Mass., vol. X, 1934, p. 264.

⁸ Strabo, *Geographica*, XI, 5, 37; Cass. Dio, LI, 19, 3.

տեղիական դիրքով, պաշտպանունակությամբ և տնտեսական նշանակությամբ պրինցիպատի կազմավորման շրջանում կրկին վերածվեց Հռոմի արևելյան քաղաքականության հիմնական օբյեկտի։ Ամբողջ այս ժամանակաշրջանի համար Օգոստոսից մինչև Ներոն, Հռոմի արևելյան քաղաքականության հիմնական ստրատեգիական նպատակները մնացին անփոփոխ։ Փոխվում էին լոկալ դ քաղաքականության անցկացման ձևերն ու մեթոդները՝ կախված Հայաստանում տիրող քաղաքական իրավիճակից և Պարթևստանի ռազմական դիմակայությունից։ Հռոմը Հայաստանում գործում էր Արտաշիսյան հարստության՝ իրեն հարմար ներկայացուցիչներից մեկին պարտագրելու մեթոդով։

Հռոմի արևելյան քաղաքականության առաջին փուլում Հայաստանում իշխեցին Արտաշիսյան հարստության վերջին ներկայացուցիչները՝ Տիգրան III-ը, Արտավազդ III-ը, Տիգրան IV-ը։ Արտաշիսյան վերջին գահակալ Տիգրան IV-ը 1 թ. ընկավ Հայաստան ներխուժած «լեռնական» ցեղերի դեմ մարտում, և Արտաշիսյան հարստությունը հանգամանքով՝ նրա գահակից քույրը՝ էրատոն, հրաժարվեց իշխանությունից։

Հայաստանում Արտաշիսյան հարստության անկումով քաղաքական իրավիճակն Առաջավոր Ասիայում ծայր աստիճան սրվեց։ Հռոմը, որը մեծ դժվարությամբ էր Հայաստանը պահում իր ազդեցության ոլորտում (իշխող հարստության մի ներկայացուցիչն մյուսով փոխարինելու միջոցով), ստիպված էր իր քաղաքականության անցկացման նոր ուղիներ որոնել։

Արտաշիսյան վերջին գահակալ Տիգրան IV-ի մահից, և մ. թ. 2 թ. Պարթևստանի հետ ուլայմազարային հարաբերությունները վերականգնելուց հետո Օգոստոս կայսեր թոռ Գայոս Կեսարը՝ Հռոմի լիազոր ներկայացուցիչն արևելյան պրովինցիաներում, օկուպացրեց Հայաստանը¹⁰։ Ստանալով Օգոստոսի համաձայնությունը, նա Հայոց գահին հաստատեց հարևան Ատրպատականի արքա Արիոբարդան Մարին։ Այս իրադարձությունները և Դիոն Կասիոսի հաղորդումը, որ Արիոբարդանը Հայաստանը աստացավ Օգոստոսից և ծերակույտից»¹¹ խոսում են այն մասին, որ Հռոմի արևելյան քաղաքականության անցկացման մեթոդների մեջ վճռական փոփոխություններ կատարվեցին, ինչը նշանավորեց սկիզբն այդ քաղաքականության մի նոր փուլի, երբ Հռոմը Հայաստանը համարելով նվաճված երկիր ու անտեսելով հայ հասարակության շահերը, Հայոց գահին էր հաստատում իրեն հարմար տարբեր արքայատների ներկայացուցիչների, որոնք Արտաշիսյանների հետ ազգակցական ինչ-որ կապեր ունենալով հավակնում էին Հայոց գահին։

Հռոմի արևելյան քաղաքականության այս փուլում Հայոց գահին արագորեն իրար հաջորդեցին հռոմեական դրածոներ Արիոբարդանը, Արտավազդ IV-ը և Տիգրան V-ը, ինչը պարզորոշ ապացուցեց Հայաստանը Հռոմի գերիշխանության ոլորտում նման մեթոդներով պահելու անհնարինությունը։ Սրանցից հետո Հայաստանում թագավորեց էրատոն՝ վերջին Արտաշիսյան արքա Տիգրան IV-ի քույրը, ապա Հայոց գահին փորձում էր հաստատվել Ոնոն I-ը¹², հռոմեական նախկին դրածոն Պարթևստանում, որը գահից զրկվել և վտարվել էր պարթևական նոր արքա Արտավան III-ի կողմից։

Վերադարձված իրադարձությունների նման սրընթացությունը պայմանավորված էր ինչպես նրանով, որ Հռոմը զբաղված լինելով արևմուտքում տարբեր ապստամբությունների ճնշմամբ, չէր կարող ակտիվորեն խառնվել արևելյան գործերին, այնպես էլ նրանով, որ արևելքում Հռոմի քաղաքականությանը համառոտն դիմակայում էին որոշակի ուժեր Հայաստանում և Պարթևստանում։ Երբ վերջապես հնարավորություն ստեղծվեց անդրադառնալու

⁹ Զ. Մանանդյան, նշվ. աշխ., էջ 293։

¹⁰ Tacitus, Annales, III, 49.

¹¹ Cass. Dio. LV, 10a, 7.

¹² Tacit. Ann., II, 4.

արևելյան գործերին, Մերձավոր արևելքում ստեղծված քաղաքական իրավիճակը Հռոմին հարկադրեց լուրջ ուղղումներ մտցնել իր արևելյան քաղաքականության իրացման մեթոդներում:

Հայաստանի և Պարթևստանի փաստացի անկախ վիճակը պոտենցիալ սպառնալիք էր Հռոմի արևելյան տիրույթներին, «Կախյալ թագավորություններն» համակարգը և դրա հետ կապված արևելյան սահմանների պաշտպանությունը կարոտ էին արմատական վերակառուցման, Կոմագենեն, Կիլիկիան ու Կապադովկիան ղրկվել էին թագավորներից և դրանց հետագա վիճակը սպասում էր կարգավորման:

Կուտակված պրոբլեմների լուծման համար ծերակույտի որոշմամբ մեծ լիազորություններով Արևելք ուղարկվեց Գերմանիկոսը՝ Հռոմի նոր պրինցեպս Տիրերիոսի հղբորորդին¹³, 18 թ. գալով Ասորիք, Գերմանիկոսը, շնայած բազմաթիվ այլ կարևոր գործերին «իր առաջնահերթ պարտքն էր համարում հնարավորին չափ շուտ հասնել հայերի մոտ»¹⁴: Տակիտոսի այս հաղորդումը բավական ճշմարտանման է, իսկ Գերմանիկոսի մտահոգությունը՝ միանգամայն հասկանալի:

Հայաստանի առանձնահատուկ դրության և կարևոր ստրատեգիական նշանակության պայմաններում արևելքում բոլոր մնացյալ պրոբլեմների լուծման հաջողությունը մեծապես կախված էր Հայաստանի գահակալության հարցի ընդունելի լուծման և այստեղ հռոմեական աղդեցությունը վերականգնելու հաջողությունից: Հաշվի առնելով հայ հասարակության մեծամասնության համակրանքները և տրամագրվածությունը, Գերմանիկոսը 18 թ. Արտաշատում Հայոց արքա թագադրեց պոնտացի արքայազն Զենոնին, որը ստացավ Արտաշես արքայանունը¹⁵: Հայաստանում Զենոն-Արտաշեսի (18—34) թագավորումով Հռոմի արևելյան քաղաքականությունը թևակոխեց իր հաջորդ փուլը, երբ Հռոմը ստիպված էր փաստորեն ճանաչել Հայաստանի աուվերենությունը՝ գահին ժողովրդի և ավագանու թեկնածուին հաստատելով Հայաստանը Հռոմի ազդեցության ոլորտում պահելու համար:

Հայաստանի գահակալության հաջող լուծումը Գերմանիկոսին հնարավորություն տվեց ընդլայնել Հռոմի տիրույթներն Առաջավոր Ասիայում՝ պրովինցիաների վերածելով Կիլիկիայի մեծ մասը, Կոմագենենի և Կապադովկիայի թագավորությունները, և այդ «բուֆերային» պետությունների վերացմամբ ուղղակի վերահսկողություն հաստատել արևելյան սահմանի վրա:

Այս կախյալ թագավորությունները հռոմեական պրովինցիաների վերածելը թելադրվում էր քաղաքական նկատառումներով: Այն պայմաններում, երբ Պարթևստանում հաստատվել էր Հռոմի դեմ թշնամաբար տրամադրված Արշակունիների հարստության կրտսեր ճյուղը հանձինս Արտավան III-ի, Կապադովկիան և Կոմագենեն որպես կախյալ թագավորություններ պահպանելը վտանգավոր էր, քանզի դրանց արքաները հեշտությամբ կարող էին դաշնակցել պարթևներին: Բացի այդ, Հայաստանի վրա հռոմեական ազդեցության վերականգնումով այն դարձել էր պարթևական հնարավոր ոտնձգությունից Հռոմի արևելյան տիրույթները պաշտպանող վահան:

Այսպիսով, հակառակ Տիրերիոս կայսեր օրոք հռոմեական քաղաքականության պաշտպանողականության մասին ընդունված կարծիքի, հենց Տիրերիոսը վճռական փոփոխություններ կատարեց Հռոմի պրովինցիալ քաղաքականության մեջ (ֆինանսների, տնտեսության և վարչական ապարատի կարգավորման նպատակով) և, ինչպես ցույց տվեց ժամանակը, նրա քաղաքականությունը դուրս եկավ ավելի ճկուն ու հեռանկարային, քան Օգոստոսինը: Անժառանգ Զենոն-Արտաշեսի մահից հետո 34 թ. Պարթևստանն ակտիվորեն ներգրավվեց Հայաստանի գահակալության հարցի լուծմանը: Իր տևա-

¹³ E. Koestermann. Die mission des Germanicus Im Orient, (Historia, V. 7, 1958, p. 334).

¹⁴ Tacit. Ann., II, 55.

¹⁵ Նույն տեղում, 56:

կան թագավորության ընթացքում Արտավան III-ն ամրապնդելով իշխանությունը և զգալիորեն կենտրոնացնելով պետությունը, անցավ ագրեսիվ արտաքին քաղաքականության, ձգտելով վերականգնել Արեւմտյան տերության նախկին սահմանները։ Հայաստանի նկատմամբ պարթևական գերիշխանության հաստատումը մասն էր կազմում այդ ագրեսիվ ծրագրի¹⁶։ Հաշվի չնդստելով հայ ժողովրդի և ավազանու մեծ մասի շահերի ու ձգտումների հետ, Արտավան III-ը զորքով ներխուժեց Հայաստան և թափուր գահին հաստատեց իր ավագ որդուն՝ Արշակին¹⁷։ Հոռմի արևելյան տիրույթներում պարթևական նոր ներխուժման սպառնալիք ստեղծվեց։

Արևելքում իր դիրքերն ամրապնդելու համար Հոռմը գործի դրեց դիվանագիտության փորձված մեթոդները։ Արշակը զոհ գնաց դավադրության։ Իրերիայի և Ալբանիայի ուժերով կազմակերպվեց հակապարթևական կոալիցիա. իսկ բուն Պարթևստանում բորբոքվեց ներքաղաքական պայքար՝ Հոռմի կողմից գահին նոր հավակնորդ առաջադրելով¹⁸։ Կարճ ժամանակում այս իրադարձությունների հետևանքով Հոռմը հասավ իր մերձավոր նպատակների իրականացմանը։ 37 թ. կնքված պայմանագրով Պարթևստանը հարկադրված էր վերստին Հայաստանը ճանաչել հռոմեական ազդեցության ոլորտ։ Հայաստանի փաստացի կառավարիչ մնաց երկիրը նվաճած Միհրդատ Իբերացին¹⁹։

Ուսումնասիրողները միակարծիք են, որ Հոռմի նոր կայսր Կալիգուլայի (37—41) կառավարման ընթացքում Հոռմի արևելյան քաղաքականության մեջ տեղի ունեցան լուրջ փոփոխություններ՝ մասնավորապես որոշ պրոպինգիաների վերստին վերածումը կախյալ թագավորությունների և Հոռմից կախյալ որոշ արքայիկների գահազրկումը (այդ թվում և Հայաստանի)։ Անտիկ պատմիչները նման փոփոխություններին տրամաբանական բացատրություն չտալով դրանք վերագրում են Կալիգուլայի խելահեղությանը և նրա ատելությունը Տիբերիոսի բոլոր ձեռնարկումներին²⁰։ Այս բացատրությունը ընդունում են ժամանակակից շատ հետազոտողներ։ Սակայն աղբյուրների մանրազնին քննությունը թույլ է տալիս եզրակացնել, որ Հոռմի արևելյան քաղաքականությունը մեծ մասամբ պայմանավորվում էր օբյեկտիվ քաղաքական անհրաժեշտությամբ, իսկ կայսեր անձնական համակրությունները դեր էին յուզում լուրջ այս կամ այն թեկնածուին պաշտոնի նշանակելիս։

Պարթևական ագրեսիայի ուժեղացումը Տիբերիոսի կառավարման վերջին տարիներին Արևելքում Հոռմի համար զգալի դժվարություններ առաջացրեց։ Մեծ դժվարությամբ և ծախսերի գնով հաջողվեց վերականգնել հռոմեական ազդեցությունը Հայաստանում։ Տիբերիոսի օրոք արևելյան սահմանի վրա հաստատված ուղղակի վերահսկողությունը պահանջում էր Առաջավոր Ասիայում տեղաբաշխված հռոմեական զորական ուժերի քանակական ավելացում, ինչը դժվար իրագործելի էր թե՛ ֆիզիկապես և թե՛ ֆինանսապես։ Բայց անդամ արևելյան սահմանի ուղղակի վերահսկողությունը պարթևական ագրեսիայի ուժեղացման պայմաններում չապահովեց Հոռմի արևելյան տիրույթների անվտանգությունը։ Հայաստանի գահակալության հարցի վերջնականապես լուծված չլինելը Հոռմին նորից ու նորից հարկադրում էր վերսկսել

¹⁶ Պրինցիպատի կազմավորման ժամանակահատվածի ընթացքում Պարթևական տերության արտաքին քաղաքականության մանրամասն վերլուծությունը տե՛ս մեր հոդվածում՝ «Պարթևական տերության քաղաքականությունը Հայաստանի նկատմամբ» (ՀՆՍՀ ԳԱ կրթերհաս. գիտ., 1987, № 8)։

¹⁷ Tacit. Ann., VI, 31; Cassius Dio, LVIII, 26.

¹⁸ Josephus Flavius, Antiquitates Judicae, XVIII, 97—98; Tacitus, Ann. VI, 31—35.

¹⁹ Suetonius, Galus. XIV, 3; Jos. Flav., Ant. Jud., XVIII, 100—101; Cass. Dio, LIX, 27, 3.

²⁰ Tacitus, Annales, XIII, 3; Jos. Flav., Ant. Jud., XVIII, 256.

պայքարը Պարթևստանի հետ՝ երկրում հռոմեական ազդեցությունը պահպանելու համար: Արտավան III-ի օրոք Պարթևստանի ռազմաքաղաքական ճնշման ուժեղացման պայմաններում հռոմեական պրովինցիաների վերածված նախկին կախյալ թագավորություններում պարթևները լուրջ օժանդակություն պետք հռոմեական տիրապետությունից դժգոհ լայն խավերի շրջանում: Այսպիսով, Տիբերիոսի օրոք Հռոմի արևելյան քաղաքականության մեջ տեղի ունեցած փոփոխությունները կատարված էին պահի անհրաժեշտությամբ, ունեցած փոփոխությունները կատարված էին պահի անհրաժեշտությամբ, սակայն փոփոխված քաղաքական հանգամանքներում զգալիորեն թուլացնում էին Առաջավոր Ասիայում Հռոմի դիրքերը: Զգալի թվով կախյալ թագավորությունների վերածումը հռոմեական պրովինցիաների՝ վաղաժամ դուրս եկավ, քանզի դեռևս չէին ձևավորվել սոցիալ-տնտեսական համապատասխան պայմաններ՝ դրանք կայսրության կազմի մեջ հիմնավորապես ներառելու համար:

Ասվածը թույլ է տալիս պնդելու, որ Հռոմի արևելյան քաղաքականության մեջ Կալիգուլայի օրոք տեղ գտած փոփոխություններն ընդհանուր առմամբ թելադրվում էին արևելյան սահմանում ստեղծված օբյեկտիվ իրավիճակով, և այդ սահմանների պաշտպանության համար կախյալ թագավորությունների համակարգի վերականգնումը բխում էր քաղաքական անհրաժեշտությունից: Կալիգուլան վերականգնեց Կոմագենիի թագավորությունը և զահին հաստատեց տեղական արքայատան ներկայացուցիչ Անտիոքոսին: Պաղեստինի արևելյան մասը թագավորության վերածվեց և հանձնվեց Հերոդիան-Արքիպպային: Պոնտոսի թագավորությունը տրվեց Պոլեմոն I-ին: Պոլեմոն I-ի մյուս թոռը՝ Կոտիսը (Զենոն-Արտաշեսի քրոջ որդին) ստացավ Փոքր Հայքի գահը: Իտուրիայի արքա նշանակվեց Սոհեմոսը²¹:

Այսօրինակ քաղաքականության պատճառներն այնքան օբյեկտիվ էին, որ Կալիգուլայի հաջորդ Կլավդիոսը, ըստ աղբյուրների վկայության, հարկ չհամարեց փոփոխել արևելյան սահմանների պաշտպանության այս համակարգը, պահպանելով և վերականգնելով կախյալ թագավորությունները:

Հռոմի արևելյան քաղաքականությունն այս ընդհանուր գծից չէր շեղվում նաև Կալիգուլայի քաղաքականությունը Հայաստանի նկատմամբ: Այն ևս թելադրված էր միանգամայն օբյեկտիվ պատճառներով:

Հռոմի և Պարսկաստանի միջև 37 թ. կնքված պայմանագրի հետևանքով Հայաստանին տիրացած Հռոմի դաշնակից Միհրդատ Բերապի մնացել էր երկրի փաստացի կառավարիչը: Նա 40 թ. Կալիգուլայի կողմից կանչվեց Հռոմ և աքսորվեց²², Դրա պատճառը պետք է համարել Միհրդատի, որպես Հռոմեական դրածոյի, ժողովրդականություն չվայելելը հայ հասարակության շրջանում: Նման խափնեակը, երբ երկրին պարտադրված տիրակալի ղեմ ցանկացած պահի կարող էր բացահայտ ապստամբություն սկսել, չէր խորոզ բավարարել հռոմեական կառավարությանը, որը շահագրգռված էր Հայաստանը իր գերիշխանության ոլորտում պահելու: Հավանաբար, նպատակ ունենալով սիրաշահել հայ հասարակության հայրենասիրաբար տրամադրված մեծամասնությանը և այդպիսով Հայաստանը պահել հռոմեական ազդեցության ոլորտում, Կալիգուլան զահրենկեց արեց Միհրդատին: Բացառված չէ, որ Միհրդատի շնորհագրկման պատճառ կարող էր լինել նրա հայ «հպատակների» բողոքը²³: Անգամ անհավատարմության մասին չստուգված մատնության հիման վրա Կալիգուլան զահրենկեց էր անում ենթակա արքան:

²¹ Suet., Gaius, XVI, 3; Jos. Flav., Ant. Jud. XVIII, 7, 2; Cass. Dio, LIX, 12, 2; Tacit., Ann. XII, 21.

²² Tacit., Ann., XI, 8; Cass. Dio, LX, 8.

²³ Նման պրակտիկայի գոյություն մասին է վկայում այն փաստը, որ իր իսկ հպատակների կողմից մեղադրված Կապադոկիայի արքա Արքեդայոսը զահրենկեց արվեց (Cass. Dio, LVII, 17, 3).

րին²⁴ Սվետոնիոսը հաղորդում է Կլավդիոս կայսեր մոտ եկած հայերի պատգամավորության մասին, որը խնդրում էր իրերացիների հեռացումը Հայաստանից²⁵։ Միանգամայն հավանական է, որ նման մի պատգամավորություն էլ գնացած լինեի Կալիգուլայի մոտ՝ Միհրդատի հեռացումը խնդրելու։

Կալիգուլայի սպանությունը (41 թ. սկիզբ) հնարավորություն չտվեց լուծել Հայաստանի գահակալության խնդիրը։ Որ Հայոց գահին Կալիգուլան պետք է հայ հասարակության համար ընդունելի թեկնածու հաստատեր, կարելի է չկասկածել։ Կալիգուլան ամեն կերպ ընդգծում էր իր հոր գործունեությունը հօգուտ պետության բարօրության և հարգում էր նրա հիշատակը²⁶, որստի Հայաստանի գահակալության խնդրի լուծման հարցում ևս նա պետք է որ հետևեր Գերմանիկոսի օրինակին՝ Հայոց գահին հաստատելով Հռոմի նկատմամբ բարեկամաբար տրամադրված և հայ հասարակության կողմից ընդունելի թեկնածուի։ Դա նորից կնշանակեր Հայաստանի սուվերենության ճանաչումը Հռոմի գերիշխանության ներքո։ Անուղղակիորեն նման ենթադրությունը հաստատում է այն փաստը, որ Գերմանիկոսի կողմից Զենոն-Արտաշեսի թագադրությունը պատկերող հորեյանական դրամները հատվել են Կալիգուլայի իշխանության տարիներին²⁷։ Հայոց գահի հավանական թեկնածու կարելի է համարել Փոքր Հայքի արքա Կոտիսին՝ Զենոն-Արտաշեսի քրոջ որդուն։ Որը ելնելով ազգակցական կապերից և պատմական նախադեպից, ընդունելի կլիներ հայ հասարակության համար։

Այսպիսով, վերն ասվածի հիման վրա կարելի է պնդել, որ Հայաստանի նկատմամբ Կալիգուլայի կառավարման տարիներին էլ շարունակվում էր արեւելյան քաղաքականության այն փուլը, երբ Հռոմը ստիպված էր փաստորեն ճանաչել Հայաստանի սուվերենությունը՝ գահին ժողովրդի և ավագանու թեկնածուին հաստատելով, Հայաստանը գերիշխանության ոլորտում պահելու համար։

Վերացնելով Կալիգուլայի քաղաքականության վտանգավոր ծայրահեղությունները և ամրապնդելով հռոմեական իշխանությունն արևելյան պրովինցիաներում, Կլավդիոսը փորձեց Հայաստանի գահակալության հարցը լուծել ելնելով զուտ հռոմեական շահերից։

Միհրդատ իրերացին 43 թ. վերադարձվեց աքսորից և ուղարկվեց Հայաստան։ Հռոմեական ու իբերական զորքերի օգնությամբ կոտրելով հայ ժողովրդի դիմադրությունը և հակառակ նրա ցանկության, Միհրդատը, հաստատվեց Հայոց գահին, իսկ երկրում տեղակայվեցին հռոմեական զորամասեր²⁸։

Այս իրադրությունները նշանակում էին Հռոմի արևելյան քաղաքականության անցումը նոր փուլի, երբ Հռոմը Պարթևստանի ագրեսիվ քաղաքականության և պարթևական հնարավոր ոտնձգության պայմաններում Հայաստանն իր գերիշխանության ներքո էր պահում իբերիայի թագավորի օժանդակությամբ՝ նրա ազգականին որպես իր դրածո Հայոց գահին հաստատելով և երկրի ստրատեգիական կետերում հռոմեական զորամասեր տեղաբաշխելով։

Հայոց գահին Միհրդատ իբերացու վերահաստատվելը Անդրկովկասի ժողովուրդների միջև թշնամանք սերմանելով պետք է հշտացներ Հռոմի գերիշխանության պահպանումը Հայաստանում։ Դեպքերին ժամանակակից հռոմեացի պատմիչը ծայրահեղ պարզույթյամբ մերկացնում է Հռոմի այդօրինակ

²⁴ Նման մի մատուցյամբ իշխանությունից զրկվեց տեսարարոս Հերովդես Անտիպասար (Jos. Flav., Ant. Iud. XVIII, 7, 2).

²⁵ Suet., Claudius, XXV.

²⁶ CAH, vol. X, p. 665.

²⁷ V. Ehrenberg, A. H. M. Jones, Documents illustrating the reigns of Augustus & Tiberius, Oxford, 1949, p. 103, n. 182; C. H. V. Sutherland, Coinage in Roman Imperial policy, 31 B. C.—A. D. 68, London, 1951, p. 103.

²⁸ Tacit., Ann., XI, 8—9.

քաղաքականության էությունը, գրելով. «Անհրաժեշտ է երկպառակություններ սերմանել, ինչպես հաճախ արել են հռոմեական պրինցիպսները, մեկին կամ մյուսին առատաձեռն նվերի ձևով տալով Հայաստանը, որպեսզի բորբոքեն բարբարոսների հոգիները և դրդեն նրանց խառնակության»²⁹։

Միհրդատ Իբերացուն ճանաչելով Հայոց արքա, Հռոմը կարող էր հուսալ, որ Հայաստանին տիրանալու Պարթևստանի նոր փորձերի դեպքում, Իբերիայի արքան գործուն օժանդակություն ցույց կտա Հայաստանում թաղավորող իր եղբորը՝ ընդդեմ երկուսին էլ սպառնացող պարթևական փտանգի³⁰։ Միաժամանակ, բռնի ուժով պարտադրված օտար տիրակալի դեմ հայ հասարակության մեծամասնության թշնամությունն էապես կթուլացներ վերջինիս դիրքերը, հարկադրելով մշտապես զգալ հռոմեական օժանդակության կարիքը, դրանով իսկ Հայաստանը պահպանելով հռոմեական գերիշխանության ոլորտում։ Սրանում պետք է տեսնել պատճառն ալե բանի, որ Հռոմը լրջորեն չարձագանքեց 52 թ. Միհրդատ Իբերացու սպանությանը նրա եղբորդի Հուդաթիգի կողմից և փաստորեն պաշտոնապես ճանաչեց վերջինիս Հայոց արքա թագադրվելը³¹։ Այսպիսով, Հռոմի արևելյան քաղաքականության այս վերջին փուլը շարունակվեց նաև Հայաստանում Հուդաթիգի (52—54) կառավարման ընթացքում, այսինքն մինչև Կլավդիոսի կառավարման վերջը։

Այս իրադարձությունների հետ զրեթե միաժամանակ Պարթևստանում տեղի ունեցան քաղաքական փոփոխություններ, որոնց հետևանքները բախտորոշ նշանակություն ունեցան Հայաստանի հետագա ճակատագրի համար։ Պարթևական նոր տիրակալ Վաղարշ I-ը Հայոց դահի հավակնորդ առաջադրեց իր եղբորը՝ Տրդատ I Արշակունուն, այսուհետ Հայաստանը ճանաչելով որպես անկախ թագավորություն, հայ հասարակության մեծամասնությունը վերջինիս գերադասեց հռոմեական դրածո Հուդաթիգից։

Հայ ժողովրդի հայրենասիրաբար տրամադրված մեծամասնության չղադարող անձնազուգ պայքարի շնորհիվ Հայաստանն ազատվեց հռոմեական գերիշխանությունից և վերականգնեց իր պետական անկախությունը, որը շուտով ճանաչվեց երկու տերությունների կողմից։

Այսպիսով, աղբյուրների հաղորդումների քննությունը և պատմական իրադարձությունների համադրումը մեզ բերում է այն եզրակացության, որ պրինցիպատի կազմավորման շրջանում Հռոմի արևելյան քաղաքականության մեջ տեղի ունեցած փոփոխությունները որոշակիորեն պայմանավորված էին նաև իր ազատության համար հայ ժողովրդի մղած պայքարով։ Պրինցիպատի կազմավորման շրջանում Հռոմի արևելյան քաղաքականության ստրատեգիական նպատակների անփոփոխության պայմաններում ներքին և արտաքին հանգամանքների ազդեցությամբ այդ քաղաքականության անցկացման տակտիկական ձևերն ու մեթոդները փոփոխվում էին։ Վերը կատարված քննության հիման վրա Հայաստանի նկատմամբ Հռոմի վարած քաղաքականությունն ըստ նրա անցկացման ձևերի ու մեթոդների կարելի է բաժանել հետևյալ փուլերի. 1-ին փուլ՝ մ. թ. ա. 20 թ.—1 թ.—Հռոմը իր գերիշխանությունը Հայաստանում պահպանում էր Հայոց գահին իշխող Արտաշիսյան հարստության հռոմեական դաստիարակություն ստացած ներկայացուցիչներ հաստատելու միջոցով։ 2-րդ փուլ՝ 2—17 թթ.—Հայաստանը համարելով արդեն նվաճված երկիր, Հռոմը Հայոց գահին էր հաստատում իրեն նվիրված տարբեր արքայատների ներկայացուցիչների, որոնք Արտաշիսյանների հետ ազգակցական կապեր ունեին։ 3-րդ փուլ՝ 18—43 թթ.—Հայաստանն իր ազդեցության ոլորտում պահելու համար Հռոմը ստիպված էր փաս-

²⁹ Նույն տեղում, XII, 48.

³⁰ Նման օգնություն Միհրդատին նրա եղբայրը՝ Իբերիայի արքա Փարսմանը արդեն իսկ ցույց էր տվել 35 թ.:

³¹ Tacit., Ann., XII, 46—49.

տորեն ճանաչել նրա սովորենությունը՝ գահին հայ հասարակության թեկնածուի հաստատելու միջոցով: 4-րդ փուլ՝ 43—54 թթ.—Հռոմը Պարթևստանի տիրակալների շարունակվող ագրեսիվ քաղաքականության և իր տիրույթների նկատմամբ: Պարթևական հնարավոր ոտնձգության պայմաններում Հայաստանը իր գերիշխանության ներքո էր պահում Իգբրիայի կառավարողների օդնությունը և երկրի ստրատեգիական կետերում հռոմեական գերամասեր: սեղարաշխիով:

ПОЛИТИКА РИМА В АРМЕНИИ В ПЕРИОД СТАНОВЛЕНИЯ ПРИНЦИПАТА

(опыт периодизации)

А. Э. ХАЧИКЯН

Р е з ю м е

Основные стратегические цели восточной политики Рима в период становления принципата наметились уже в начале правления Августа и оставались неизменными в течение всего периода. При этом в зависимости от внутренних и внешних обстоятельств изменялись тактические формы и методы ее проведения. На основании этих изменений политику Рима по отношению к Армении условно можно разделить на следующие этапы:

I этап (20 г. до н. э.—I г.)—Рим навязывал стране удобного для себя претендента на царский престол из числа представителей правящей династии Арташесянов:

II этап (2—17 гг.)—рассматривая Армению как покоренную страну и игнорируя ее интересы и стремления, Рим назначал ее царями угодных себе кандидатов из восточных принцев или правителей, имевших отдаленное родство с Арташесянами;

III этап (18—43 гг.)—Рим был вынужден признать суверенитет Армении, утверждая на престол кандидата армян, для сохранения страны в сфере своего влияния;

IV этап (43—54 гг.)—Рим, при агрессивном внешнеполитическом курсе Парфии и ее возможной экспансии, удерживал Армению под своим протекторатом при помощи правителей Иберии, разместив в стране гарнизоны своих войск.

POLICY OF ROME IN ARMENIA DURING THE FORMATION OF PRINCIPATE

(periodization experiment)

А. Е. ХНАЧИКИАН

S u m m a r y

The main strategic aims of oriental policy of Rome during the formation of principate were observed already at the beginning of Augustus' government and stayed unchangeable in the course of the whole period. By this, in dependence of inner and outer circumstances tactical forms and methods of its contact were changed. In virtue of these changes the policy of Rome as regards Armenia conditionally can be divided into following stages:

I stage (20 B. C.—1)—Rome forced upon the country convenient for him claimant to the king's throne from the representatives of the governing of Artashesian dynasty;

II stage (2—17)—considering Armenia a submitting country ignoring its interests and aspirations, Rome appointed its kings from the candidates, from oriental princes or governors, who pleased them and had remote relationship with Artashesians;

III stage (18—43)—Rome had to recognize sovereignty of Armenia, confirming to the throne the Armenians' candidate for preserving the country in the sphere of his influence;

IV stage (43—54)—Rome with the aggressive foreign policy of Parfi and her possible expansion, kept Armenia under its protectorate with the help of Iberia, billeting the garnisons of their forces in the country.